

國史書集

清代傳記叢書



明文書局印行

清代傳記叢刊・綜錄類⑦
周駿富輯

國朝耆獻類徵初編

(四九)

卷三六〇至
卷三七〇

(清)李桓輯



明文書局印行

1262/14

國朝耆獻類徵初編卷三百六十目錄

忠義三十

劉成得

楊伏國等

楊萬年

陳尙賢等

阿爾薩朗

高舉

子堯
李國良等

林朝輔

李榮光

常萬清

余海等

安如峒

陳裕後

白澄清等

西津泰

譚公義

冶正華等

諸神保

文光斗

張文貴

彭天亮等

顧世臣

李廷桂等

田占魁

速得貴等

盧應朝

陳國樑等

烏爾恭阿

德成額等

楊秉昭

張錦榮等

豐伸布

增福

愛新等

雙保

齊郎阿等

賈永吉

周禮等

巴哈布

蒙彪等

馮培元

江永輝等

國朝詩林卷之三

李真 黃有學等 惠倫

國朝耆獻類徵初編卷三百六十

通奉大夫前署江西巡撫江西布政使司布政使湘陰李桓輯

忠義三十

劉成得

楊代國等

劉成得甘肅西甯人由行伍於乾隆十九年拔提標中營左哨外委二十年擢中營右哨頭司把總二十四年隨征準噶爾二十五年擢康家寨千總二十八年調提標中營千總三十二年升巴里坤鎮標右營守備三十六年升陝西神木協中軍都司尋調哈密協中軍都司四十一年失察哈密臺站書吏受賄奪職經哈密辦事大臣明琦奏請畱任效力四十三年署巴里坤鎮標右營遊擊

四十九年以效力八年期滿復職五十一年實授中軍遊擊六十年升陝西西安城守營參將嘉慶元年署潼關協副將尋帶兵赴雒南商州連界之月兒灣諸處防堵川楚教匪二年三月楚匪由魯山西竄伏牛山是山縣互豫省南召盧氏等縣西接陝西雒南商南潼關諸處成得率兵偕同州府知府朱勳於雒南雞頭山七盤磨設立總卡擇險堵守四月賊匪屯盧氏縣之瓦窯溝連撲商南之東西捻耳溝卡隘成得聞信率兵星馳堵剿殲擒四百餘人餘賊潰逸成得復進兵追躡賊匪由兩路突出四面合圍成得眾寡不敵身受重傷歿於陣時賊竄掠安康縣陝西固原鎮標後營守備楊伏國隨總兵慶溥分兵迎擊首先前進歿於陣甘肅西甯

鎮標右營千總徐士柏提標後營左哨二司外委把總趙盛揚均力戰陣亡其擊賊於金家山者山東撫標右營守備徐天佑曹州營把總王瑄甘肅大馬營把總張述勳俱以力戰受傷陣亡先後事聞諭曰竄匪由盧氏闖入商南參將劉成得帶兵堵禦受傷陣亡殊爲可惜著加等議卹餘賜卹如例均賞雲騎尉世職襲次完時以恩騎尉世襲固替成得子傑襲伏國子鶴襲士柏子大祥襲盛揚子倫襲天佑子林襲瑄子延恩襲述勳子其興襲伏國甘肅山丹人士柏甘肅綏甯人伏國由行伍隨征金川力戰受傷拔外委洊升千總嘉慶二年檄剿四川達州教匪屢立戰功升是職盛揚天佑俱張掖人瑄山東單縣人述勳甘肅甯州人

右 國史館本傳

楊萬年 陳尙賢等

楊萬年陝西長安人由行伍於乾隆三十八年從征金川歷戰六十九次敘功列超等四十二年拔西甯鎮標右營額外外委四十七年升本標前營把總四十九年隨剿石峯堡逆回擢安西州千總五十九年升西甯鎮標右營守備嘉慶元年十月派赴漢中興安一帶剿捕邪匪旋調赴四川追捕達州邪匪二年四月隨四川總督宜綏等分兵圍剿金戛寺清溪場賊巢萬年偕西甯鎮標右營千總陳尙賢西甯鎮標中營外委祁紹堯陝西大通協左營外委古萬龍率領官兵鄉勇先登木城斫開寨門官兵擁入賊眾抗拒萬年等奮勇衝突皆受重傷歿於陣是年四月擊賊於王家寨

陣亡者甘肅巴燕戎格營額外外委韓成祥先後事 聞奉 旨
楊萬年陳尙賢祁紹堯古萬龍著加二等議卹萬年紹堯尙賢萬
龍俱廕雲騎尉襲次完時給予恩騎尉世襲罔替成祥卹如例萬
年子世茂襲尙賢子性善襲紹堯子洪業襲萬龍子玉林襲尙賢
紹堯成祥俱甘肅西甯人尙賢由行伍於乾隆五十二年拔甘肅
西甯鎮標額外外委五十六年補前營外委是年二月隨征廓爾
喀殺賊三擒賊二敘功列超等五十七年授威遠營把總嘉慶元
年擢本職

右 國史館本傳

阿爾薩朗

阿爾薩朗蒙古鑲白旗人賴奇忒氏由健銳營前鋒補前鋒校果
遷至副前鋒參領乾隆三十七年十月赴金川軍營次年七月擢
烏槍護軍參領四十年五月授正紅旗蒙古副都統自八月十二
日先後經副將軍明亮派往納木迪克爾瑪什扎古及阿爾古噶
爾角各寨落攻獲甚多獨古木思得礮寨十餘處官兵直斫礮門
賊巢埽蕩事 聞 諭交部優敘四十一年正月以阿爾薩朗前
次攻克達撒谷受傷得 旨賞給緞二匹並 諭將傷痕愈否之
處卽爲覆奏阿爾薩朗聞 命感奮帶兵攻取甲雜獨松等處最
有功將軍阿桂卽以入奏得 旨賞給阿爾杭阿巴圖魯名號金

川平圖像於紫光閣 御製贊曰跬步皆山面前萬仞無著足處
攀騰奮迅遂破扎古既翹且英人中獅子實稱其名五月領兵回
京十二月授喀什噶爾領隊大臣四十二年七月轉鑲藍旗蒙古
副都統四十四年十二月充伊犁領隊大臣四十九年正月 諭
令回京行抵蘭州聞逆回滋事奏赴安甯縣隨同陝甘總督李侍
堯協剿於六月初二日到陝甘軍營卽迎殺賊匪三百餘名至伏
羌縣擊斃賊目三人獲賊二十九名縣有雲霧山賊眾據險爲拒
勢張甚阿爾薩朗率領遊擊德海等奮勇攻撲殺賊二百餘名生
擒賊首馬玉華餘賊十名獲首級四十是役也阿爾薩朗與提督
剛塔總兵蘇靈阿等分兵左右兩路功最多躡追至秦安縣屬之

土鼓山賊眾四路憑高乃與都統五岱會合探明路徑設法剿捕
旋逐賊至田家山賊依山屯聚官兵分三路副都統圖桑阿等居
中左翼三德右翼阿爾薩朗各帶兵八百名奮力仰攻賊卻我兵
進奪山梁賊大驚竄進至底店復以兵五百人在北山一路搜獲
敗逃餘眾統兵大臣入奏得 旨嘉獎七月授鑲紅旗護軍統領
時官兵圍石峯堡賊巢安卡挑壕斷其水道大學士公阿桂奏派
阿爾薩朗率同侍衛官兵在石峯堡西北一帶嚴防隨以京兵分
兩路進剿由堡後西北山直上拋擲火彈擊斃壕內之賊甚多時
大兵四面環攻賊窮蹙思竄我師矢石齊發阿爾薩朗等督兵進
堡擒殺賊目及餘匪以千計奪獲器械無算事平帶領京兵回京

五十五年調正白旗護軍統領補公中佐領五十六年三月轉正藍旗滿洲副都統五月以前在護軍統領任內失察守庫護軍糾竊銀兩一案 諭降二級畱任五十九年六月開復嘉慶元年九月又以揀選護軍參領不公革職畱任時楚北邪教擾及豫中都統永保奏請添兵 命阿爾薩朗等帶領健銳火器營勁旅各一千名往豫省交永保調遣十一月與副都統碩雲保等在大江東北滾河一帶督兵兜剿阿爾薩朗復攜步卒渡河結營以防敗走之賊因都司福甯阿疏於防守被賊偷渡滾河向西竄逸疊奉諭旨以阿爾薩朗等俱係特派帶領京兵大員未能會籌妥辦酌量分布本有應得之咎究非總統之人著寬免治罪仍傳旨申飭

二年正月賊首姚之富等分股南竄阿爾薩朗由張家集會同將軍恆瑞永保分路進剿賊復思東竄阿爾薩朗督同翼長七十五等率健銳營滿兵乘勝薄之斃賊目繆玉林等三名餘匪三百餘名生擒十九名又至興隆集彭家岡遇潰匪狂奔率馬兵截擊斃賊六七百人又領烏槍步卒赴迎山岡奮剿賊目三名賊匪四五百人蒙賞大小荷包以示鼓勵又攻賊於杏兒山賊爭棄輜重走阿爾薩朗偵知沿途有伏匪卽圍其村用火箭火彈斃賊千餘名二月帶領滿漢兵二千搜剿東北一路逃竄餘匪擒首逆劉起奏入賞金盒銀絲盒大小荷包復由洛陽店一帶跟剿逸匪於均州於官潭晝夜巡防又繞至唐家店賊恃眾抗拒阿爾薩朗等

分領馬隊入其陣七十五等分步兵爲兩翼左右進攻共殺賊三百餘人事聞賞金盒大小荷包以示鼓勵三月在觀音巖搜殺逸匪又於尙家店緝獲匪徒韓文滔等三人斃十三人又赴小阜街邢家川截剿竄賊四月署工部尙書惠齡奏以鄖陽邊界緊要派阿爾薩朗率舊領滿兵赴鄖西等處截剿慮匪眾向西南與達州邪匪潛相勾結也旋奉諭阿爾薩朗經惠齡派赴三尖山防守復因賊匪擾至鄖陽檄催協剿三尖山距鄖西不遠何以總未赶到延緩之咎實無可辭阿爾薩朗卽領兵至表帶鋪堵截並爲鎮安聲援五月朔日聞西北逸出之賊距鎮安且近率兵進至午峪溝遇賊匪乘馬者二百餘人擊之斃數十人餘眾奔避追殺